

November
2017



KRISTIAN THALAI

thlen
chin
atanga
HMASAWN

Vol. VIII No. 9

Kristian Thalai Pawl Chanchinbu thla tin chhuak



Delhi Branch K.T.P. Musical Meet 2017



Mission Veng Bial K.T.P Diamond Jubilee – Bial hrulaitu



KTP General Conference Vawi 52-na Organising
Committee leh CKTP hruaitute



Lungdai Branch Workcamp @ Dononjoypara

Kristian Ṭhalai Pawl chanchinbu thla tin chhuak**1970-a chhuah ṭan ■ Kum 47-naa vawi 11-na ■ Chhuah tawh zat : 468****Editor :**

Lalchhuanliana

Joint Editors :

Lalhnehzova

Lalfamkimi

Lalmuanawma

Dr. David C. Vanlalfakawma

Manager :

Lalmuanpuia

A lak man :

Kum khatah - ₹ 80.00

Copy khat - ₹ 7.00

*Thu chhuah tūr nei chuan Editor,
Kristian Ṭhalai, Synod Office-ah thawn
tūr a ni a; a la duh chuan KṬP Office-ah a
man pèk lâwk a ngai.*

Office Phone : 9436142398**E-Mail :**kristianthalai1970@gmail.comcentralktp@gmail.com**KRISTIAN ṬHALAI PAWL****Thupui**

Rawngbawl tūra chhandam

Thupui inngahna

Ephesi 2:10. Thil ṭha ti atán
Krista Isuaah chuan siama awmin,
ama kutchhuak kan ni si a, chu thil
ṭha tih chu kan awmna tūrin
Pathianin a buatsaih lâwk a ni.

Thiltumte

1. Isua Krista rinna leh amah anna
kawnga ṭhalaite hruai.
2. Kohhran kutke ni tura ṭhalaite
buatsaih.
3. Kohhran hnathawh tihpuitlin.
4. Krista Chanchin Ṭha puan
darh.

A CHHUNGA THU AWM

1. Editorial	2
2. Krista zuitu nun	3
3. KṬP ka ṭhatpui	7
4. KṬP, Delhi Branch 'Musical Meet' 2017	10
5. Mihring hi eng nge a nihna hlu ber	14
6. Kum 40 hnuah	17
7. Ka pu Mayweather	20
8. WorkCamp report : Dononjoypara	24
9. Hringlang tlang : Rawngbawlna danglam	25
10. Kantu – Serchhip Chhim Veng Branch	29
11. Keimahni	30



HMANGAIHNA

“Pathianin khawvel a hmangaih em em a; chutichuan, a fapa mal neih chhun a pe a,” tih hi khawvel damna a ni. Hmangaihna tih hi kawng hrang hrangin sawi a ni a, Pathian hmangaihna te, nu hmangaihna te, nula tlangval inhmangaihna pawh ni se, chu hmangaihna chu tihlan emaw, sawi chhuah emaw a nih loh chuan awmzia a nei thin lo.

Ringtute hi Pathian hmangaihnaa phuar khawm kan nih angin mi dangte hmangaih hi ringtu zawng zawng mawhphurhna a ni a, Bible pawhin hmangaihna ngawt lo chu tu ma eng mah ba lo turin min hrilh bawk a. Hei hian kan mihringpuite nena inlaichinna tha ber chu hmangaihna hi a ni tiin a khai khawm, kan ti thei ang.

Hmangaihna hi ringtu tan chuan nun dan tur satliah ni lovin, thupek leh kan tihmakmawh a ni a, kan hmaah hian mi dangte chungka kan lantir theihna tur hun remchang a inhawng leh ngei dawon, chu chu Lal Isua pian cham lo thleng tur kan hmuah danah hian a ni. Krismas lo thleng tur hi mi tam tak chuan nghakhlel takin an lo thlir ngei ang a, thenkhat thung chuan huphurh takin an lo thlir ve mek thei bawk. Krismas hi khawvel tlantu pian cham hriat rengna, Pathian thilthlawnppek kan dawonna hun a nih hre chungin, Pathian chawimawia a awm theih nan mi dangte tan malsawmna thlentu ni thei turin Kristian thalaite hian he hun hi i hmuak ang u hmiang.

Kristian thalai tam tak chuan he hunpui kan hman tawhah mahni inhaiourna leh nawmsip bawlna lam hawiin sum tam tak kan khawh ral tawh thin a. Fahrahte, retheite, riangoaite, thinlung ngui takte khawesak tinuamtu, hlimna thlentu, an riltamna puhurutu nih hi Kristian thalaite nun nen hian a inhmeh hle a ni tih hi i hre thar ang u. Kan phak tarok leh tlin tawkah theuh mi dangte tan malsawmna nih hi hmangaihna lan chhuahtir nan hmang thei ila a duhawm hle.

KRISTA ZUITU NUN

— Upa F. Roꠊhuamlia
N.Chhimluang

‘Kristian’ chu Krista ringa zuitute kan ni. Kristian nihna dik tak chu eng lai pawha a nuna Krista lal berna nun neitu hi a ni. Isuan, “Tu pawh a kraws pua mi zui lo chu ka mi ni tlak a ni lo,” (Mt. 10:38) tia a lo sawi hian Isua zuitu (Kristian)-ten Krista an zui avanga tih tur leh mawhphurhna an nei a ni tih a tichiang hle awm e. Miin Krista a zui chuan ama duh dan leh nunphung aia a zui Krista rilru ꠆awmpuina kawngah a ꠆hang lian deuh deuh tur a ni a. Tih loh tur a ti lo ang a, tih tur dik tak a tih chu a mawhphurhna a ni.

Tirhkoh Paula’n heti hian a sawi a, “Krista hnenah kaihthawha in awm ve tawh chuan chung lam, Pathian ding lama ꠆hu Krista awmnaa thil awmte chu zawng rawh u. Chung lama thil awmah te chuan in rilru nghat tlat rawh u, leia thil awmah te chuan

nghat lovin. In thi tawh a, in nunna chu Pathianah chuan Krista hnenah thuhrukin a awm si a” (Kol. 3:1-3). Hmangaihtu Krista a thlan avanga Krista duh zawng tih chu nuam a ti a, thil khirh a ni lo ve.

Chhandamna kan dawnsawn dan leh kan hriat dante hi Bible kan kaih pharha, kan inchik a ꠆ul ta viau mai. Chhandamna leh tlannaa duhtawk mai, Krista duh dan ꠆awmpui lova Kristian, Krista tel lova nung ꠆hin, vanram kai chauh duh Kristian ni ringawt hi kan awm fur awm e. Kristian kan nihna hian ken tel a nei a. Isuan ti hian a sawi: “Thu ka pek zawng zawng che u pawm turin zirtir rawh u...” tiin. Krista thu min pek hi hril leh sawi chauh ni lo, a taka nunpuia zawm chu kan mawhphurhna a ni (Mt. 28:18-20).

A rin leh a hriat anga nung thin Paula khan khawngaihna avanga chhandamna thawktu Isua rilru tawmpui a, Krista a zui chungchang ti hian a sawi a, “Krista hnenah khen behin ka awm ta; keimah erawh chu ka ni tawh lo, Krista chu keimahah a nung zawk a ni; tin, tuna tisaa ka nung hi rinnaa nung ka ni – Pathian fapa, mi hmangaiha ka aia inetu rinnaah chuan,” tiin (Gal. 2:20). Kristian inti zingah Krista chu keimahah a nung ti thei lo a awm theih awm e.

Kristian nun dan dik tak chu Krista thupek zawm a ni a, kan nunah Krista a lal a, Krista thupek kan zawm hian keimahniah Krista a nung tihna a ni. Amah zuia, a thupekte zawm tura duhtu - Isua thupekte hi Bible-ah kan hmu a, chu chu Krista nun dik tak (Christian Ethics) tia kan sawi hi a ni. Amah (Krista) zuitu chu – thuhnuairawlh tur te, taima tur te, rinawm tur te, inpumkhat tur te, mi dange tan malsawmna ni a, rilru dik pu tur leh thil dang tam tak min zirtir a, a hniaka

kan zuina turin entawn tur min hnutchhiah bawk. Krista hmangaihna leh dah lalna aṭanga mi in chu chu a nun chhuahpui chuan a awmna hmun apiangah danglamna a thlen thin a ni. Hetiang hian chhui zui ta ila-

1. HMANGAIHNA

Lal Isua zuitute tih tur leh mawhphurhna tam tak zinga pakhat chu ‘Mi dange hmangaih’ a ni. Krista nun laimu a ni a, a zuituten an zawm tura a duh em em a ni. Thupek ropui ber leh zawlneite thu zawng zawng khai khawmna Isuan a sawi a, “Lalpa i Pathian chu i thinlung zawng zawngin, i rilru zawng zawngin, i thlarau zawng zawngin i hmangaih tur a ni,” tih hi. Chu chu thupek ropui ber leh pawimawh ber a ni. Tin, a dawttu leh a anpui chu hei hi a ni, “Nangmah i inhmangaih angin i vengte pawh i hmangaih tur a ni tih hi,” tiin (Mt. 22:35-40). Pathian leh mi dang kan rawngbawlpuite hmangaih hi Kristiante nun chhan tur a ni. Kristian nun

leh mi dangte hmangaih hi lak hran theih a ni lo. Krista kan thlanga kan zui a nih chuan ni tina kan tih tur leh mawhphurhna a ni.

2. LANG TLANG NUN

Mi dangte hmangaih hi Kristian nun chhan tur a ni kan tih mek lai hian, "I zawm em?" tiin inzawt ila, zawm lo nih chu kan duh lo mai thei. Mihring nihphung leh a hnam pum huap leh mi mal mal pawh han inen chiang ta ila, 'zawm' kan ti thei vek lo mai awm mang e. Bawh-chhiatna hrin mihringte tan chuan a har a nih hi. Chhia leh tha thliar thiam lo, nausen hnute hne lai aṅga tar tawh thleng hian mi dangte aia mahni indah pawimawhna kan nunpui vek si a nih hi.

Mizoten kan chhuan em em kan pi leh pute nun mawi, Kristian nun nena inrem hlea kan hriat thinte hi a kil lehlam aṅga thliar chuan mi dangte hmangaihna nun tak tak hi a phawk chhuak chiah lo niin a lang. Khaw thar an kai apiangin hmeithai leh chhumchhiaten dai leh khaw

hmawr an chang thin a, mual êng an chang pha ngai lo. Lo tur an theh tum pawhin an dinhmun ena a chang tha leh thlang hmasa tur awm zawkten an thlang hmasa ngai lo a nih kha. He thlirna aṅga thliar hian sawi tur tam tak a awm thei awm e. Kan pi leh pute nunah khan mi dangte hmangaihna tak tak khan hmun a chang thuk lo deuh, ti ila a sual em lo vang chu. Tun thleng hian nunphung anga kan neih mek Zo nun mawi leh kan Kristianna hian kan tualzal nunah mi dangte hmangaihna kawngah danglamna a thlen tam lo hlein a lang.

Vervekna tel lova mi dangte hmangaih tur kan nih laia, kan rilru milpui, min duhsaktu, kan kawmngaih, kan rawngbawlpui, kan thian, kan chhungte leh kan thawhpuite pawh hi kan hmangaih tak tak em? Kan hmuh reng pawh kan hmangaih thei lo a nih chuan kan tidik hauh lo vang le. Rel tih ṅawngkam hi hmelhriat tha hle mah i la, mi rel hrat nih chu kan duh der bawk si

lo. Pakhat lainata, pakhat huat chu pawh lovah kan ngai si. Kan hlauh leh zah deuhte leh kan aia kan dah hniamte laka kan ṭawngkam hman dan inthlau lutuk te, hnam dang kan hmuh hniamte laka ṭhat chhuah ṭula kan hriat loh tlatna zawng zawng te hi 'Kristian nun' dan tur dik a ni ngai lo a ni.

3. NUN HONA NUN

Kristian leh Kristian lo bulah pawh Kristian dik tak chuan Krista zui/tu a nihna a lantir ṭhin. Kan ṭhian kawmna leh kan tualzal nun thlir hian a taka nunpuitu (ringtu tak) kan tam lo a ni thei mai lo maw? Krista zuitu nun hi sawi maia ral lovin a taka nunpuinaah a innghat a ni. 'Krista zuitu' nihna nun hi kan ṭhelh duai ang tih a hlauhawm ṭhin mang e!

'Krista zuitu nun' nun dika nung, mi dangte hmanngaihtu chu Krista avangin mi dangte tan a luang chhuak ṭhin. Mi dangte ṭhatna lai a hmuhsak thiam ṭhin. Mi

dangte hmelah Krista hmel a hmu thiam a, mi dangte ṭhat tawh lohna lai sawi lo turin a insum thei. Mahni thu a duh lutuk lo va, ṭawngkam a duh uluk bawh a, mi rilru tihnat a duh lo. Mite inremtirtu nih leh malsawmna nih a tum fo ṭhin.

TLANGKAWMNA

Samari mi ṭha tehkhin thu kan hriat, a harsa lai ber chu mi dangte hmangaiha Krista zuitu nun tar lanna hun – sum leh pai, tha leh thil dang sen ni lovin, kan chuanna aṅanga chhuka, kan sa chung a mi dang chuantir hi a ni ṭhin. Hei hi harsa viauvin lang mah se, Isuan min zirtir a tum leh zawm tura min duh chu a ni si. Krista kan zui duh takzet a nih chuan mi dangten kan thiltih leh nunah hmuh an nei ang a, hmuh pawh an chang ngei ang. 'Krista zuitu nun' miten an hmuh theih nan i inbuatsaih thar ṭheuh ang u, tiin kan insawm a ni e. Amen.

KṚP ka ṭhatpui

— J. Khawhmingthanga
Asst. Leader, W. Phaileng Bial

“Hun leh tui lianin min nghak lo,” tih angin, ‘Eng tik niah emaw chuan kan la over ve ngei ang a’ tih suangtuahna nena kan phet ve lawp lawp laiin, Kristian Ṭhalai Pawl inkaihhruaina danin KṚP-a kan tel min phalsak chin hmawr tawpah kan lo awm ve ta reng mai! La tel pawh ni ila, kan ṭangkai nep deuh tawh bawkin a rinawm. Chutiang dinhmuna han din takah chuan, ziak fung hmang thiam tak ni ve mah suh ila, Kristian Ṭhalai Pawl ka ṭhatpuina leh hlutnate tlem azawng han thai lan ve ka’n tum dawn a ni.

Khawvel a changkang zel a, zirna in hrang hrangte pawh a lo tam tain changkang tak tak a ni ta vek mai; mahse, he pawl ropui leh thianghlim tak baka inzirna ṭha hi awm chuangin a lang lo. Khawvel zirna aṭangin mi thiam pui pui

leh fing tak tak, chhenfakawm tak tak an chhuak mek a, an la chhuak zel bawk ang; mahse, finna dik leh tluantling min pe thei em tih hi ngaihtuah ta ila. Heng zirna in ṭha pui puia lut tur hian qualification sang tak tak leh sum leh pai tam tak sen a ngai ṭhin. He Kristian Ṭhalai Pawlah erawh hi chuan a rethei ber aṭanga a hausa ber thlengin kan telna min dal thei pawn lam tehna reng reng a awm ve lo. Chu KṚP (A lamtawiin kan sawi zel tawh ang)-ah chuan thil tam tak kan zir si. A va hlu em! Thih hnu piah lama pawimawh zawk kan thlarau damna tura kawng dik inzirtirna leh inchher puitlinna hmun dang a awm awm lo ve.

Tu pawh mai hian kan dam chhunga kan tum leh, nih loh kan hlauh tak chu mi zah kai ve hi a ni awm e. Mi dangte hmuhsit leh hnuaichhiah hlauvin rim takin hna kan thawk a, kan bei fat fat ṭhin reng a ni. Dik tak chuan khaw khata a veng kawkel ber lai, step thui zet kal

hnua mi in hnuai puk reih rawiha khawsa ve, a rem rem ei ve nawk nawk tan chuan mi zah phurh viau chu har tak a ni. Mahse, he KṚP-a a kûl a taia theihtawp kan lo chhuah vena chuan sumin a lei vek bik theih loh zahawmnna thlengin min lo thuan a. Eng mah ni lo kha mi nu leh paten an fate kaihruaituah min lo ring tawkin, ṭhalai tam takten zah tlaka min ngaia kan thu leh hla an han ngaichang ve ṭhap ṭhin te kha hlu deuh asin. KṚP-a inhmang tak chuan tu biak chhawhchhi mah an tawknai lo mai ni lovin, mite rin leh inngah ngamna an ni ṭhin.

Nupui pasal zawnna atan pawh hian a aia romantic leh hmun ṭha a awm chuang lo asin. KṚP huang chhung ngei aṭanga ṭha taka inngaihzaun bul ṭan te hi chuan Kristian chhungkua hi a bul ret aṭangin an ṭan nghal a lo ni. Ngaihzaung nei chungga Pathian fak leh chawimawi ṭhulh chuang lote chu KṚP pawn lamah hian vang tak an ni ngeiin a rinawm. Mahni theihna leh chakna hma-

chhuan duh lova Lalpa remruatsakna nghak chungga KṚP tak maia nupui pasal zawngte chu pawn lama inthingnawi fawm nawk nawkte ai chuan an chhungkaw kal zel dan a fuh deuh nge ngein a hriat.

Ṭhalai tu pawh mai hian hlim kan mamawh vek a, hlimna zawngin kan ṭlan suau suau zel bawk a, KṚP ni lova hlimna dang zawng, kawng dik lo zawh ta ṭhalai tam tak an awm mek zel bawk a ni. KṚP tluka ṭhalaite tana vanglaini chenna hmun dik leh ṭha hi a va awm lo em! He pawl ropui takah hian nuam taka kan vanglai hi chen theih a ni tih hria ila, hmun dang hi kan zawng hauh lo vang le. Mahni ta tur leh hlawkna tur ni se, kan theih loh tur pawh rawngbawl na avanga hah pawh sawi lova khek rawih rawih chungga chārtin kan han pu thei te kha aw! Thutak hlamchhiah chuang si lova KṚP sports, intihlim, fellowship, etc. programme hrang hrang khabe bal dawn dawna nui chungga kan han hmang ṭhin te kha eng zat mah hian

ka hralh phalin kei ka ring lo! Khawhar hi thalaite chuan kan tih theih loh leh hrehawm kan tih ber pawl a ni thin. Khawhar hre hman lek lova min awm tlei thintu chu he KṚP ngei hi a nia sin. He pawl ropui tak hian thil tam tak min lo zirtir a, a tha lam kawngah chuan thiam loh leh tih ngai loh neih a rem miah lo te kha kawng hrang hranga min tipuitlingtu a lo va ni em!

Hmasawanna um a tlan thin thalaite tan he KṚP-ah hian ni tin sikula zir ve si loh hmasawanna, nun puitlinna leh thiamna tam tak zir chhuah tur a awm asin. Thlarau lam nun leh finna leh hriatna tam tak hi he pawla inhmangete chuan an lo hai chhuak teuh teuh dawn a lo ni. "Lehkha zir sang lo pawh ni se, kohhran/KṚP-a inhmangete tak chu lak tlak loh tak a awm theih loh," an lo tih fo hi a dik reng a ni. Thil tam tak kan tawng a, kan thawk a, kan zir a, tihsual pawh a awm fo, tihdik lah a tam. Chu chuan hun lo kal zela kan nun atan tawnhriat min lo neihtirin hmasawanna tam tak min lo pe

si a, a lo va hlu em! Pawl dang leh hmun dang thiltihnaah pawh KṚP-a chhum hmin thak chin tawh hi chu koh thut dawl tak an lo ni zel mai. Committee, rorel, member hmaa thusawi engkim kan lo paltlang tawhna khan nasa takin thil dangah pawh puitlinna min pe reng mai a lo ni.

Sawi vek dawn ila, sawi tur a tam ang. Eng pawh ni se, ka thalai pui duh takte, he pawl ropui tak Kristian Thalai Pawlah hian chhandamna kawng min hruai thleng thei thutak, hring nun puitlinna tura kan mamawh leh finna leh thiamna hrang hrang a awm a. Thalai awm khawm ta chu dik fel fai famkim vek bik loh chang pawh a awm ang, chungte lo la vawnga lo sawi hnawm leh puhchhiatna awm ve fo thin mah se, thalaite tana a aia awmna tura tha hmun dang a awm chuang lo tih hriain, i vanglai hun hlim tak leh hlawk taka chen turin ral thlir mai lo leh mi dang awmna tur chauhva dah mai lovin, a hlutna leh a nawmna pawh phak turin i KṚP zel ang u.

KṚP, Delhi Branch Musical Meet 2017

— *Thangdailova*
Mizoram Synod Choir
(2016-2018)

KṚP, Delhi Branch 'Musical Meet' programme hi September ni 9-11, 2017 chhung hman a ni a. Meet hmanpui turin CKṚP Committee leh Mizoram Synod Choir-te sawm kan ni a, programme-te tluang taka hman zawh a ni.

Musical Meet tobul

Delhi Branch hian kumin kum tir lamah project siamin luan chhuahna lam leh member-te intihchak tawn nan hma-chhawp siamin, Musical Meet hman a rel thlu a. Member-te hma ngaia Pathian thlarau thianghlim pawl tharna chan beisei chung a Musical Meet buatsaih chu Kohhran Committee pawhin phal tak leh inhawng takin hma lak zui rem a ti a, Central committee lamah pawh hmanpui tura sawmna hi theh luh a ni zui ta bawka. Meet hmang turin CKṚP committee aṅangin mi pathum – Rev Zothansanga, Leader; T.Upa Ngruhmingliana, Asst. Leader leh Pu Lalchhuanliana, Kristian

Ṛhalai Editor te ruat an ni a. Anni rual hian Mizoram Synod Choir leh Choir Director Pu K. Lalruatpuaia, CKṚP committee member ni bawka te nen mi 29 kan kal a ni.

Zin kawng

September ni 8, 2017 (Zirtawpni) chawhnu dar 2:30 velah Aizawl chhuahsanin, hemi ni vek hian zan dar 6:20 velah Delhi kan thleng a. Delhi airport-ah hian Bial vawngtu Pastor David Lalramliana Ralte leh a nupui Pi K. Lalnglaki te, Delhi Br. OB – Tv. Laldusaka, Leader; Tv. Lalrosanga, Secretary; NI. Dr. Lisa Lalmuankimi Pachuaui, Finance Secretary te leh NI. Lynda Zothanpari Ralte, Br. committee member-ten min lo hmuak a. Zan dar 8:30 velah Synod House, Jyoti Bhavan, Kalkaji-ah innghatin, Delhi Field Secretary, Rev. R. Lalrosiama'n min lo dawngsawngin lawm thu sawia inhlanna min lo hmansak a ni.

KṚP, Delhi Branch

KṚP, Delhi Branch hi March ni 6, 2016 (Pathianni)-ah din a ni a. KṚP inkhawm hmasa ber hi April ni 11, 2016 (Thawhṫanni) niin member 102 lai an inkhawm thei a ni. Branch Committee member 26 awmin kohhran represent mi 3 nen an vaiin 29

an ni. Sub-committee 4 lai siam a ni baw. Kumin atana Branch Budget pangngai bakah special budget te leh meet pual budget te nen, budget zawng zawng belh khawm hi cheng 4,30,000/- a tling a ni. Delhi branch hian missionary 2 chawmin, Kristian Ṭhalai copy 60 an la mek baw.

Member-te hi zirlaite leh hnathawka awm te a tam zawk an ni a, kuminah hian member 407 inpe awm mekin, inkhawm an thlahlel thei hle ṭhin a. Kohhran zaipawl rawngbawlna lamah pawh ṭhahnem an ngai tlang a, Chawlhnia kohhran inkhawm banah leh thla khatah wavi hnih inkhawm an nei ṭhin a, ṭawngṭai inkhawm wavi khat an neih bak zawng chu hla zir nan an hmang ṭhin bawka, Meet puala hla zir hnuhnung berah phei chuan mi 92 an tling.

Central committee lam aṭanga tih tur pek apiang Pathian awmpuina azarah an la tihlawhtling thei zel baw.

Meet hman dan tlangpui

‘Musical Meet’ programme-ah hian inkhawm ṭum li leh fellowship ṭum 1 awmin, hei hi variety programme-a hun hman a ni. September ni 9 (Inrinni) leh ni 10 (Pathianni) chu ‘Bharat Ghar’, Sarojini Nagar-ah hun hman a ni a, a hmunah zaipawl te riahna hmun

buatsaihsak kan ni nghal baw. September ni 11, 2017 (Thawhṭanni) zan ṭhalai inkhawm chu ‘Hotel South Gate’, green park extension-ah neih a ni. September ni 9, 2017 (Inrinni) chawhnu dar 2:00-ah Delhi branch committee-te leh ex-officio te nen ‘Bharat Ghar’-ah inkawm hona hun hmangin Meet bul kan ṭan a, inhmel-hriattirna te bakah zawhna leh chhanna hun te hmangin zangkhai takin hun kan hmang a, zanriah kan kil ho nghal a ni.

Inkhawm kan ṭhahnem thei hle a, inkhawm tam ber ṭum hian mi 358 kan ni a, ṭhalai inkhawm zanah pawh mi 247 lai kan ni baw. Pathian faka zai nuam kan ti a, kan phur tlang hle a, tihtakzeta Lalpa fakna hmunah zai hona boruak nung tak a awm ṭhin tih a takin kan hmu a ni.

Inkhawm ṭum thumah, CKṬP Leader, Rev. Zothansangan ‘Thlen chin aṭanga hmasawn’, ‘Rawngbawl tura chhandam’ leh ‘Pathian nena inremna’ tih thupui pathum hmangin thuchah ropui tak a sawi a. Family counselling lama mamawhtu tan hun a hawng bawka, a hlawk hlein a lang. Ṭhalai inkhawm zanah CKṬP Asst Leader, T.Upa Ngurhminglian thuchah ngaihnam tak ‘Pathian mi hriat’ tih thupuia

hmangin a sawi bawk. Heng bakah hian variety programme-ah thusawi tawi T.Upa Ngurhmingliana hnen a ñang hian kan ngaithla bawk a, Kristian Thalai Editor Pu Lalchhuanliana leh Bial vawngtu Pastor David Lalramliana Raltete pawhin short sermon hunah, tawi fel tak fun kim siin thu an sawi a, a khamawm loh hle a ni.

He Musical Meet-ah hian Synod Choir-in hla ñum 14 kan rem a, Delhi Kohhran Zaipawlin hla ñum 1 an rem bawk a, zaipawl pahnih infin hian 'Isu, ka hmangaih che' tih hla Synod Choir Conductor Pu Lallianmawia Tlau phuah chu kan rem bawk.

Heng zaipawl bakah hian Musical Meet-ah hian item chi hrang pariat: solo, male voice, female voice, instrumental music, duet, live band, fak lam, musical skit te a ni a. Item changtu mi 18 lai awm theiin mit leh beng a tlai hle a. Item changtu zawng zawngten thiam takin an rawn tihlawh-thing thei vek a ni.

September ni 10, 2017 (Pathianni) zanah inkhawm ban lenkhawm dar 9:20-ah kan zai ho ñan a. Hei hi NI. Joan Lalchhungpuii, Br. Treasurer-in a kaihruai a, tui tak leh hlim takin kan zai a, lamtual mawi tawk an

awm zel bawk a. Lenkhawmna hun erawh zan dar 10:00-ah a taxpna siam a ngai a, mahni ram anga duh chen chen zai ve mai theih a ni lo va. Rules and regulation-in P.A. system hman leh thawm han neih chu zan dar 10:00 thleng chauh a phal avangin Upa R. Lalropuia i/c KTP-in ñawngñaina a hman zawhah kan ñin ta a ni.

Inkhawmna hmun platform uluk taka cheiah, sound system ña tak nen programme uluk taka duan chu khaihlak leh her rem ngai awm lovin kan hmang tuan thei a. Hun hmangtu apiang ten Kohhrana ñawngkam hman awm tak zel hmangin, inkhawmna hmuna incheina tur awm tak zelin an inchei a, a lawmawmin a ropui hle a ni. Meet pual hian sub-committee - Field Secretary, Rev. R. Lalrosiama te; Ramthar Pastor, Rev. P.C. Rohlira leh Rev. R. Lalthlenglianate'n inkhawmahte min rawn uap bawk avangin kan phuisui hle a ni.

Delhi Kohhran

December ni 4, 2015 (Zirtawpni) khan kohhran committee chu a wawi khat nan ñuin hei hi kohhran din ni atan pawm a ni a. Bial vawngtu, Pastor David Lalramliana Ralte a ni a. Kohhran committee

member 14-ten kohhran enkawl hna an thawk a ni. January ni 26, 2016 (Thawhlelni) aʔangin Hotel Southgate, Green Park Extension, New Delhi-ah, chawhma dar 11:00-a ʔanin kohhran inkhawm pawh bul ʔan a ni. Kohhran inkhawmna hmun leh hun turah kohhran mite ngaichang reng chungin ngaihtuah a ni a. Pathianin a kohhranho ʔawngʔaina a hun takah chhangin September ni 3, 2017 (Chawlhni) aʔangin Believers' Church, Haus Khaz hmuna chawhnu dar 3-a ʔanin, inkhawmna hun nghet leh hmun nghet an lo nei thei ta a ni. Danzawhkim hi 2016 report-ah 183 an awm mek bawk.

Upa Bial 5-a inʔhenin, Aizawl khawpui tiat vel zela zau ni hlawm mah se, beihruah thupuite upa bial tinah zirin, inkhawmna hmun hla takah pawh mi ʔhahnem takin ngai pawimawhin inkhawm an hmaih meuh lo a ni. Kohhran chungkuate kil tinah ʔang rualin he Musical Meet hlawh-tlin nan hian theihtawp an chhuah takmeuh a ni.

Haw lam

September ni 12, 2017 (Thawhlelni) zing dar 6:00 velah Tv. C. Ramnghakthanga,

Delhi Branch committee member-in ʔawngʔaina a hman zawh hnuah Synod House aʔangin airport panin kan chhuak a, Delhi Br. OB-te leh member eng emaw zatin min thlah a. Chawhma dar 10:00-ah Delhi airport chhuahsanin, tuang takin Lengpui airport chu chawhnu dar 2:00 velah kan thleng leh ta a ni.

Lawm thu sawina

Tuang taka rawngbawl na hlen thei tura min hruaitu kan Pathian chungah lawm thu kan sawi a. Kan Synod puipate, CKṚP hruaitu, kan kal lam min thlahtute leh ʔawngʔaia min thlahtu kan GS Upa Zonun-mawia te, Nl. Lalfamkimi, CKṚP committee member, Meetrawn chhimtu te, Delhi Field Secretary, Rev. R. Lalrosiama leh a chung te, airport-a min lo hmuaka min thlah lehtu Delhi lama rawngbawlpui te, Delhi kan cham chhunga kan inthiar velnaa min buaipuitu te, kan veivahna leh hun kan neih rei lo tak kara hmun ropui tak taka min hruaitute leh rawngbawl na kan hlen theih nana ʔawngʔaia min lo dilsaktu zawng zawng chungah lawm thu kan sawi e.

Mihring hi eng nge a nihna hlu ber

— *Lahlimpuia (Atea)*

Luangmual Vengthlang Branch

Norway ram khawpui Oslo-a hmun pakhat, biak in lian vak lovah hian Nilai zan apiangin Pathian thu zir turin an kal khawm thin a. Chumi hmuna zirtirtu, Pastor chuan zan khat chu Pathian aw ngaihthlak a pawimawhzia leh, chumi zawm chu mihring tan tihmakmawh a nih thu te a sawi a. Chu hmuna inkhawm ve thin nula pakhat, Marie Claire-i chuan Pastor thusawi chu a hre thiam mang tlat lo va, "Pathian hian mihring hi a be thin reng em maw ni le?" tih chu a ngaihtuah fo thin.

Inkhawm an ban hnu chuan thin thenkhat nen dawrah an lut a, coffee in chung chuan inkhawmnaa Pastor thusawi chu an khel zui laih laih hlawm a. An zinga mi thenkhat chuan Pathianin kawng hrang hranga a

hruaina leh a enkawlna an sawi a, an hlim tlang hle. Zan a rei deuh hnu chuan haw turin an inbuatsaih a. Marie-i pawh chu hmanhmawh lutuk lova insiamin, a car chuan a inkalh haw a. Car khalh pah chuan, "Pathian, min rawn biak chuan i thu ka zawm ang," tiin bangbo angreng tak leh eng mah a thlen zui pawh ring lem lovin rilruin a tawngtai a.

Chumi hnu lawk chuan an in pana car-a a tlan par par lai chuan mak tak maiin a thinlungah kawng kam dawr lian atanga bawnghnute lei a ngaih thu a rawn awm ta thut mai a. A ngaihna hre lovin ring tawk hian, "Lalpa, nangmah em ni?" a han ti ngawt a. Chhanna eng mah a dawn tak loh vah chuan a tlan zui ta zel a. Thui pawh a tlan hmain kawng kual lai takah chuan a hma ang bawkh khan bawnghnute lei a ngaih thu chu a thinlungah chiang zetin a rawn lang leh ta a. A ding ta a, "A nih leh Lalpa, bawnghnute chu ka lei ang e," a ti ta ringawt a, a tlan leh nghal vat a.

An in thleng tur chuan kawngpui ata peng miah lova tlan zar zar tur a ni a; mahse, mak tak bawkin a thinlungah kawngpui ațanga peng tura nawrtu awm leh tlatin a hria a, fiamthu deuh pah chuan, “A ța e Lalpa, i thu ang zelin ka ti ang e,” a ti a. Kawngpui ațang chuan a peng a, kawng chep leh ti rik rek hi zawhin a tlan zel a, a tawpah chuan mi rethei chen khawmna hmunah a chhuak ta hlawl mai a.

Chu lai hmuna dawr awm chhun leh in eng emaw zah chu rauhsan ni awm tak hian a reh hian a reh tlawk tlawk a. A luah lum țintu mi retheiho pawh an retheihna theihnghil ni awm takin an lo mu fel vek tawh a. Thâwk laa a hawi vang vang lai chuan mi tu emaw hian, “I bawng-hnute kha kawthler lehlama cheng chhungkaw pakhat hnenah sawn va pe rawh,” tia hriattirna a hre leh ta. Hriat loh awin a kalna tura a kawhhmuh chu a en a, thlahrang bak an awm lo vang e, tih tur khawp hian a thim mup a. A hlau leh beidawng

baw si chu a thaw hlawp hlawp a. “Lalpa, a va awih-awm loh ve! An muhil vek tawh ang a, tun ang huna mi dang kaitho tur chuan mi â nih a ngai ang chu,” a ti a. Chechang ngam lovin a țin ta reng a.

Tlem a han chawlh deuh hnu chuan ina kal tur chuan a rilru a siam thar a. A car kawngka chu hawngin, “Lalpa, i thu a nih chuan ka kal ang a, bawnghnute chu ka va pe ang e. An duh leh mi a-ah pawh min lo ngai ang hmiang, i thu zawm hi ka duh ber a ni alawm. I thu min hrihl hi a dik ringin ka kal dawn e. Lalpa...hei ka țin a nia...” a ti a, Pathian chu a be mawlh mawlh a.

In a va thlen chuan a lo reh țin a, a thim mup baw a. A reh dan ațang chuan a chungah mihring chêng an awm ang tih rin a har khawp mai. Kawngka chu a han kik dat dat a, in chungah chuan mihring chêng an lo awm ngei a, an lo la muhil lo baw a, thawm riva a hre zui ta thuai a. Mipa aw hian, “Tu nge ni? Eng nge i duh?” arawn ti a.

Jeans kekawr leh T-shirt ha mipa pakhat hian kawngka a rawn hawng a, a tho hlim hlawl a ni tih a hmel aʔang chuan a hriat hle. A hmelah chuan mak tihna leh chutiang hunah mi dang tu mah a beisei lo tih a hmuh theih a.

“Eng nge ni a?” a ti leh a, Marie-i chuan a bawnghnute lei chu khai chhuakin, “Hei hi rawn pek che u ka duh a ni,” tiin a chhang a. Engtin mah chhang zui lovin, a kuta huin in chhungah chuan an lut dun a, pindan chhungril lam chu a panpui zel a. Mipa chu a hmel aʔang chuan a hlim hle tih a hriat theih a. Pindan an va luh thlen chuan a nupui ni ngei tura a rin chu a va hmu a, a hlim nghal hle a. A bul lawka khumah chuan naute, kum pawh la tling lo tur tih hriat chu a lo ʔap a.

Mipa chu inthup tum hle mah se, a mit awm dan aʔang chuan a ʔap tih a lang a. A hnua hpei chuan insum zo lovin Marie-i bulah chuan a ʔap ta a. “Unaunu, kan kawngka i rawn kik khan kan nupain kan lo ʔawngʔai zo chia h a ni. Pawisa eng mah

kan nei lo va, kan naute ei tur bawnghnute leina tur takngial pawh kan nei tawh lo. Pathian hnenah amah intum chawp turin kan nupain kan lo ʔawngʔai ringawt mai a. Tichuan, Pathian chuan bawnghnute min rawn pe ta a ni,” a ti a. A lawm avanga a bianga mittui luang chu a hru pah reng a. A nupui pawh chuan, “Pathian hnenah angel zinga pakhat chu eng emaw tal kenga kan ina rawn tir turin kan ngen asin! Nangmah hi angel chu i ni hial lo maw?” a lo ti ve bawk a. Ani pawh chu a lawm takzet tih hai rual a ni lo. An thil sawi chuan Marie-i thinlung a khawih hle mai.

A ipte a zen a, a pawisa ah zawng zawng chu mipa kutah chuan a hmehbel nawk nawk a. Tichuan, Pathianin an ʔawngʔaina hi a chhang ʔhin tih a hre thar uar uar chungin, bianga mittui luang chungin in lam panin a inkhalh haw a. In a thlen chuan Pathianin a ʔawngʔaina a chhan avang leh, mi dang tan malsawmna thlentuah a hman avangin lawm thu sawiin a ʔawngʔai ta a.

Kum 40 hnuah

— *Upa David Lalliansanga*
Kulikawon Vengthlang

Kristian Ṭhalai Pawl kum bithliah chu kum 14-40 a nih kan hre ṭheuh va, he kum bithliah chhunga awmte chu KṬP-ah kan tel ṭheuhvin a rinawm. Kum 14 tlin aṭanga KṬP-a hming pe nghal leh a kul a taia ṭang nghal kan awm laiin tam tak chu kum 18 chho velah kan tel ṭan niin a lang. Tichuan, kan mizia azir te, kan theihna azir tein Group committee-ah, Group OB-ah, Branch Committee-ah, Branch OB-ah, Bial Committee leh Bial OB-ah, Central Committee leh Central OB-ah te kan lo tel ta ṭhin a.

Ṭhalai rawngbawlnaah ṭhenkhat hruaitu kan ni a, ṭhenkhat member kan ni a, kan mawhphurhna erawh a pawimawh em em vek a ni. KṬP member chuan hruaitu a ni emaw, ni lo emaw, KṬP-a

a tel chhungin KṬP inngah-nate, thiltumte hre reingin rawng a bawl ṭhin. Kan rual u deuh te pawhin ṭhalai an nih laia an rawngbawl na chan-chin sawi hi nuam an ti ṭhin hle. Kan ṭhat lai hun Pathian tan theihtawpa hlan hi kan tih ngei ngei tur a ni. Pathian pawhin mal a sawm ṭhin.

Tunlai khawvelah chuan KṬP rawngbawl nain ken pawimawh tak a neih tel chu zaipawl rawngbawl na hi a ni ngei ang. KṬP member-te chu Kohhran Zaipawlah ṭa-hnemngai takin kan tel ṭhin a, kan theihna azirin Bial Zaipawlah, zaipawl dang thlan bikah te, a tawpah Mizoram Synod Choir-ah te hial kan inhlang kai ta ṭhin. Zaipawl rawngbawl na tel lo chuan ṭhalai rawngbawl na pawh a kim thei lo. Ṭa-hnemngai takin KṬP member kan nih chhung hian i zai zel ang u.

Khail e, kan thupuiah kan lut tawh ang a. Heti zawng hian sawi ta daih ila. Ṭhalaiten KṬP-a kan tel lai

aṅang hian inhlanna tak tak leh hmahlir ṭha tak kan neih ṭheuh a pawimawh takzet a ni. Sap ṭawngin han sawi ila, kan hre thiam vek tho va. Ti hian a hming han phuah ve ila – “Drop out” kan tam lutuk.

1. KṭP member suala tlu ta, kum 40 tlin hmaa KṭP chhuahsan kan tam khawp mai. Mahse, hei hi chu kan thupuiin sawi a tum ber a ni lo. ṭhalai hnungtawlhthe chu kan KṭP hruaituten theih-tawp chhuahin an umzui reng tih kan Branch hmalakna ṭheuhvah a lang chiang.

2. A pahnihna – Kum 40 tlin hnua, KṭP over chiaha kohhran rawngbawlna pawh ngai pawimawh zui ta mang lova ṭhuthluang ta hmiahho hi “Drop out” ka tihte chu an ni. KṭP rawngbawlna ngai pawimawh em em ṭhin, zaipawlah pawh ṭhahnem ngai em em mi tam tak – kum 40 an pelh hnua kohhranin a chhawr zui hleih theih tak miah lohte hi “drop out” kan ti mai ang.

Rawngbawlnaah hian, ṭhahnemngaih tak takna rilru aṅang chuan KṭP thiltumte hi kum 40 tlin hma chiaha tuipui tur ringawt niin a lang lo va. Keiin ka lo teh venaah chuan, KṭP ka over chiaha khan kohhranah ṭhahnemngai lehzualin ka zuang lut turah ka ngai. Nihna ka neih leh neih loh lamah buai lovin, khati khawpa KṭP rawngbawlnaa ṭhahnem ka ngai thei a nih chuan, ka lo over hunah chuan ka awmna tur chu - kohhranin min hman duhna lai laia hman theiha awm a ni. Pathian rawngbawlna chuan dam chhung a daih tur a ni. Kum 40 pelh hnua chawl haadam mai lova dam chhunga Pathian tana rinawm tluan chhuak turin tuna KṭP member ni lai mek hian a rilru a siam ngei ngei tur a ni. A siam thei a nih chuan a rawngbawlna pawhin awmzia a nei lehzual ang.

KṭP member ni mekte hian hengte hi chhinchhiah tlat ila, hetiang rilru pu hian rawng i bawl ang u:

1. Kum 40 thleng chiah “Rawngbawl tura chhandam” ka ni lo. Kum 40 ka pelh hunah pawh tha-hnemngai takin kohhran ka bêl zel tur a ni.
2. Ephesi 2:10, “Thil tha ti atan....Pathianin a buatsaih lawk a ni” tih hi kum 40 ka pelh hnuah pawh a la nung reng.
3. “Isua Krista ka rinna leh amah an ka tumna te, chutianga mi dang hruai ka tum thinna zawng zawngte hi – KṚP ka chhuahtsan hnuah ka ti tak tak a ni tih miten kohhrana ka rawngbawl zui zelnah an hmu tur a ni,” tih rilrua neih chungin ka KṚP tur a ni.
4. Kohhran kutke ni tura ka hnathawh leh ka inbuatsaih thin ang ngei hian kum 40 ka tlin hunah kohhranah rinawm takin ka awm zui ngei tur a ni.
5. KṚP member ka nih laia kohhran hnathawh ka tipuitling thin ang hian kum 40 ka tlin hunah pawh ka la tipuitling chhunzawm zel tur a ni.
6. Chanchin tha puang darh tur hian kum bithliah a awm lo va. Kum 40 hnu lamah pawh ka la tangkai tur a ni.

Heti hian khar dawn ila, khing kan sawi zawng zawng khi tuna KṚP member ni laitien chhinchhiah ila, KṚP kan nih lai chauh ni lovin, dam chhunga rinawm taka Lalpa rawngbawl tlat turin thutlukna siam fel sa vekin, kum 40 kan lo pelh hunah pawh rinawm taka kohhrana rawngbawl zui theuh turin hma lam i thlir ang u.

“Thih thlengin rinawmin lo awm rawh; tichuan, nunna lallukhum ka pe ang che” (Thup 2:10).

Ka pu Mayweather

— *Lalruatkima Renthlei*
Tuikual Branch

“Ka pu,” ka tih rual che chu i la ni bik lo tih ka hria; mahse, ka dinhmun leh i dinhmun a inthlauh êm avang hian ka pu lo ngam lo che a ni. Ka pu, nang chu i lar a, i theihna, boxing-ah hian tu mahin an tluk lo che a, khawvel hian a theihnghilh tawh dawn lo che. I duh duh i nei thei tih pawh ka hria.

Min hre lo

Ka pu Floyd Mayweather, Mizoram hi i hriat ka ring lo va, Aizawl phei chu hriat tumin i google phekah khan vawi khat pawh i la zawn (search) chhin ka ring lo, i tan hriat a ùl miao lo a ni. Kan thiam lo lo che.

India chu i hre vein ka ring a, kan khawpui, New Delhi leh kan khawpui lian zual deuh deuh hi chu i hre ve mai thei a; i lunglên deuhva i inngaihtuah fuh châng chuan kal châk ve deuhna hmunte pawh i nei ve mai thei.

Ka pu, nang chuan min hre lo a ni mai thei a; mahse, keini

chuan i chanchin hi thui tak kan hria. Hre lo thei pawh kan ni lo, i lar êm mai a, i chanchin hriat loh hi mi mawl nihna chi khat a nih ve tlat avangin kan hriat che hi tih makmawh a ni ve tlat a ni.

I hming leh sum

Kan ramah hian, kan mi hausa deuh ðhenkhat chu an hausak turzia hi kan lo chhutupui ve zauh zauh ðhin a; mahse, nang anga an hming leh sum sawi zawm reng reng an la awm ka hre lo.

Nang chu i ni ve lo, i hming leh sum hi a inzawm tlat a, media lamin ‘Money Mayweather’ an tih che pawh hi kan lo hre phâk ve vek. Hman ni lawka Conor McGregor nena in inhnek pawh kha ‘Money Fight’ te kha an tihsak tawp mai che a nia, i hausa tih hi a va Chiang tak!

Keini chu kan dam chhungin thawk pawh ni ila, kan hming leh sum hi eng tikah mah miin an sawi zawm ka ring lo. Sum nei tur hian keini chu rim takin kan thawk a, nang chu arawn pan zawk che ni maiin kan hria. Inhnek tura i inbuatsaihna hautakzia kan

hriatpui tho chung che hian, nang hi chu sum hian a bawmin a bawm bik che ni hian kan hre deuh reuh tlat nia maw le!

McGregor nena in inhneka i sum hlawh te, Manny Pacquiao nena in inhmachhawn tuma i hlawh te, a bâk dangte pawh kha...kan lo hriatpui ve vek che. A takin i hlawh zawng zawng hi hmu phei ila chuan thidang nawn awn awn tur hi kan ramah hian kan tam ngawt ang.

En mah teh, i hlawh kan sawina lamah hian maktaduai hi kan lo lam sek ve lo thei lo. Kan la hmuh miah lo khawpa tam sum hi tlangnel takin kan lam ve tak bawrh bawrh a, a dik tak chuan maktaduai tam sum hi inthlahrung taka sawi tur tawh lek lek hi kan ni a; mahse, nangmah avang hian tlangnel takin kan lam phah ve ta ni hian kei chuan ka hria a ni.

I car man tote hi aw...

Ka pu, nang chuan car ringawt pawh hi 100 chuang i nei niin an sawi che, kan va inthlau chianguang tak! Keini chu pakhat pawh nei pha lo hi kan tam lutuk!

Kan zinga lirthei lawm deuhvin khawvel car man to nia

an sawi – Rolls Royce, Bentley Mulsanne te, Bugatti Veyron te, Lamborghini Aventador te leh a dangte pawh, an hming hi an lam ri ve feih feih ngam chauh va, nang erawh chuan khalth sên loh i lo hung tlar leh dul hman tawh a. Khawvela car tha leh chak hi i nei loh a awm meuh lo.

He khawvela car heti zat awm zinga amah ang dang pakhat chiah awm nia an sawi, \$ maktaduai 4.7 man zet, Koenigsegg CCXR Trevita an tih pawh nang chuan i lo kawh leh dim diam tawh bawh. Keini chuan a hming ringawt pawh hi kan lam thiam mang lo asin.

A sawi zui thui peih deuhho phei chuan Los Angeles khawpuia i lirthei hunna hmunah car dum rual (fleet of all-black cars) i hung a, Miami lamah a var rual (fleet of all-white cars) i hung bawh niin an sawi a. An sawi uar lutuk a nih kan ring lo.

Van sang leh tuipuah pawh

Hei mai a ni lo, van sang lama i lèn duh châng a i chuanna, i mi mal thlawhna (private jet) tha leh chuan nuam chung-chuang, kan mi Hausa berte in chhung ai pawh a nuam tur i

neihte pawh tunlai inbiak-pawhna ðha zarah kan lo hmu pha ve hlauh va. Vawi khat pawh thlawhna ticket la hûm ve ngai lo keini ang chuan a hlutzia kan pawh phâk thlawt lo, min dem bik suh ang che.

I nawmchenna lawngleng (yatch) te phei hi chu balu lakna lawng bâk la hmu lo tan chuan mitthla pawh kan mitthla thiam lo hrim hrim. A man an han sawi a, "A va to!" tih bâkin kan sêp zui thiam lo. A thlalak kan han en a, a chung lah chu keinin vanram kan suangtuah aia a nawm lohna tur a vâng khawp mai lehngal. Em êm che hian aw...!

I zâlna man a to lua

Ka pu, mihring ve tho i ni a, i mut a ngai ve tih kan hria a, hahdam taka mahni in ngeia ðhut thlan daih pawh i ching ve ngeiin kan ring. I chenna in chanchin te pawh kan lo chhiarin kan lo hmu a, a ropui kan tih piaah lamah rapthlak kan ti.

In i neih zat hi zawt thut che ila, i sawi nghal thei mai ang em? Sawi nghal thei mai lo pawh ni la kan dem lo vang che, LSC pakhat chauh i nei miao lo va!

I duh chuan Las Vegas-ah i riak thei a, Los Angeles i ti thei a, Miami i ti thei a, a dang pawh i nei ðeuh. I in khawiah pawh hian zan khat chauh min thlentir ni la, keini chu kan mu lo vang, kan mu phal dawn lo; mut aia min tihahdam thei thil, kan hmuh ngai loh ennawm mak thar a tam dawn lutuk!

I in hrang hranga i mut pindanah hian riak kim vek dawn ni la, i bual in neih zawng zawngah hian inbual kim vek tum ni ta bawk la, kum chanve vel hi chu ni tin zan tin i phar buai a ngai mai lo maw kan ti a ni.

Mahse maw ka pu...

I hausak leh duh duh nei thei i nihzia hi ziakin sawi dawn ila, kan hril seng lo lek lek mai thei! Mahse, thil pakhat ka hrilh ve mai mai ang che, lo ngaithla rawh. Ka hrilh tur che chu hei hi a ni: i neih loh kan nei ve tlat asin! I awih lo mai thei; mahse, a dik tlat si a ni.

En teh ka pu, i neih loh kan neih chu Lal Isua a ni, kha daih kha asin!

"A ho em mai!" i ti ve ngawt ang e, a...i duh leh lo ti leh si rawh, pawh pawh kan ti chuang lo; mahse, keini chuan nang aiin

ani hi kan ngaisang a, nang aia kan entawn a ni zawk tho tho va, kan thlamuanna pawh a ni.

Nang chu i thi ang a, i dam lai hian i ropui êm mai a, keini aia ropui chuan i thi mai thei; mahse, a piah lam eng mah i nei ve lo. Keini chu kan ni lo. He khawvelah hian tluk lo che mah ila, nakinah i neih lêt hi kan nei dawn. "Nuam zawng zawng an nei vek ang," an tihna hmunah kan kal dawn a, duh leh boxing khelh nuam kan tih chuan i dam laia i khelh aia tam daih hi kan la khel ve ang, nang chu i khel thei tawh dawn lo.

Khawvela hausakna tehnaah chuan keini ngawt ai chuan i ropui tih hi kan hnial lo che a; i thawh rimna avanga hlawhtlinna i chan zozai leh i sum hlawh chhuahte hi kan ngainep miah lo, kan theih ve loh a ni; mahse, nang hi kan awtlutuk bik lo fo che tih lo hre ve rawh.

Nang chuan retheih awmzia i hre lo va, nangmah siamtu che leh hetiang i nih theih chhan pawh hi i ngaihtuah ngai tawp nang! Keini chuan he khawvela kan awm chhan leh min awmtirtu, kan chung a thil thleng zawng zawng rêltu hi kan hria a, a hmaah kan kûn thin.

Ka pu, mihring ve baw k i ni kan tih tawh kha. Hausa viau mah la, eng emaw châng chuan lungngaia i indawm kun ve thin kan ring a, i hausaknain a hnem theih loh lai che i tawn ve tho kan ring. Kha, hmanah, kum 2012 velah em ni, i bialnu hlui kut i thlak avanga lung in bang i zut ve lai te pawh a awm kha. Khatiang hun, mihring leh sumin an chhan theih loh hun che kha i tawng ve zeuh zeuh ang.

Khatiang hunah tak khan alawm i neih loh kan neih bik hi keini chuan kan chhawr thin. Ni e, i sumin i lungngaihna leh khawharna a hnem lo vang che, keini chuan hetiang a kan awm lai takte hian i neih ve loh, keinin kan neih si hi kan ko va, ani chuan engtin mah min ti lovin min hnuchhawn ngai lo! I hriat ve loh thil tha deuh kan hre ve tlat.

Duh ni la, he khawvel aţanga chhuak thil tinreng nei thei i ni a, i Hausa tih pawh kan sawi tawh kha; mahse, nang aiin kan rethei bik lo, kan Hausa zawk daih. Nang chuan engkim i nei thei a, keini chuan engkim neitu hi kan nei asin. Ka pu, kan Hausa fê zawk a lo ni!

WORK CAMP REPORT :**Dononjoypara**

KṚP, Lungdai Branch Committee kum tira ṭhu chuan kumin chhunga Branch kal dan tur hrang hrang a rel zingah kuminah ramthar zin/work camp neih ni se, thil ṭul dang chu kum chanveah ngaihtuah ṭhat leh ni se tiin a rel a. Tichuan, kum kan han hmang chho va, April thla a lo thlen chuan kan member, Pu Joseph Lalrinmawia, Evangelist, Darchoi Pastor Bial hnen aṭangin lehkha kan hmu a, an bial chhung Dononjoypara-ah biak in sak a ṭul thu te, an hmanhmawh thu te leh sa tura min sawmna lehkha a lo ni a. Branch committee chuan ngaihtuahin kal ngei ni se tiin a rel a, June 5-10 chhunga workcamp nei turin inbuatsaihna kan nei ta a ni.

Work camp-ah hian member 30 (Mipa 20 leh hmeichhia 10) kan kal thei a, June ni 5, 2017 (Thawhṭanni) zing dar 6:30-ah Bialtu Pastor, Rev. D. Zobiaka'n ṭawngṭaiin min thlah a. Bairabi lam kawnga kalin kawng diak leh nal vanga motor han nam deuh ngai tih mai loh chu kal

lamah hian harsatna kan tawk lo va, tuang taka kalin Pecharthal Mission Compound chu tlai dar 5-ah kan thleng a, thawktuten min lo dawng-sawngin kan thlen zan hian Mission Compound-a thawktu awmte inah kan thleng darh hlawm a ni.

Thawhlejni zingkarah kan mamawh hrang hrangte inlam khawmin tukṭhuan ei khamah hna kan thawhna hmun tur Dononjoypara panin kan chhuak leh a, Pecharthal mission compound aṭangin km. 18 vela hla a ni. He khua hi Reang (Bru/Tuikuk) awmna a ni a, in 38 vel awmin ringtu mi 30 vel an awm a, a tam zawk hi ringlo an la ni. Dononjoypara hi chawhma dar 10 velah kan thleng pheih a, chawl khawmuang lovin a ṭhenin riahna tur in an lo thawm ṭha a, tui chawi, ei rawngbawl, dap tah, ban khur laih, chutiang chuan mahni tih tur zawn ṭheuhah hna kan ṭan nghal a ni.

Kan biak in sak hi a dung ft 24, a vang ft 14, a chung rangva, a bang dap (Thumbawh kaih sawih), a chhuat lei, thingtuai leh thingzai hmanga sak a ni a. A hmuna thawktu awmte leh ringtu awmten a hmun tur laih

leh hmanraw lak khawm ngai zawng zawngte an lo ti lawk vek a, hnathawh a awlsam phah hle a ni.

Kan cham chhungin khaw tha tak hnuaiah hna kan thawk thei a; amaherawhchu, ni a sain khua a lum em em mai a, zingkar atanga thawk tanin chhun ni sat vanglai chuan kan chawl ve leh mai thin a ni. Thingbuk hnuaia han chawlh te hian thlan hi a dir zawih zawih thei hial a, chawhnu lamah tan lehin zan dar 8/9 thleng te kan thawk thin a, khaw lum leh ni sa avangin a chung pawh zan lamah kan chih hial a ni.

Tichuan, mahni chanpual theuhvah tu mah zelthel leh inthlahdah pawh awm lovin khaw lum tak hnuaiah tha-hnemngai takin kan thawk a. Ni 8.6.2017 (Ningani) zan dar 9:30 velah biak in hi kan sa zo thei a, chaw te eiin chaw ei khamah biak in chhungah lut khawmin Pathian hnena lawm thu sawi tanngtaina te kan hmang a; tichuan, Dononjoy khua chhuahsanin Mission compound lam panin kan pheih leh ta a ni. He kan hnathawhah hian a hmuna thawktu awmte pawhin min phurpuiin min

tanawm tha em em a. Darchoi Bial Pastor, Rev. Jehu Laldin-tluanga pawhin kan hnate min enpuiin ni tin min rawn tlawh thin a, a hmuna thawktu awmte leh mission compound-a awmte kan tan an inpein kan chungah an tha em em a, an chungah kan lawm hle a ni.

A tuk Zirtawpni chuan Kolasib lam bandh avanga kawng a tlang theih dawn loh avangin chawlh hahdam nan hun kan hmang a, zan lamah mission compound-a awmte nen inkawm hona hun te kan hmanga; tichuan, ni 10.6.2017 (Inrinni) zing dar 9:45 velah mission compound kan chhuahsan a, tluang taka lo hawin zan dar 8 velah Lungdai kan thleng leh ta a ni.

Work camp kan neih chhungin Pathian hruaina kan dawng nasa em em mai a, hna kan thawh chhungin khaw lum leh ni sa hnuaiah pawh tu man taksa lama harsatna taw lovin, inhliam leh intipalh pawh awm lovin kan tih tur tluang takin kan ti thei a, kan lawm hle a ni.

Pathian hruaina kawng hrang hrangin kan dawng a, chung zinga pakhat chu han sawi ila. Dononjoypara-ah hian

kumin kum tir ațang khan current an lo nei tawh ngai lo va, chu vang chuan keini pawhin Mission Compound ațangin generator kan keng phei hial reng a. Kan thlen phei zan ațang chuan kumin kum tir ațanga current la nei lo khan current an nei ta tlat mai a, khu laia thawktu awmte leh a khuaa mite pawhin mak an ti em em a ni.

Kal tura kan inbuatsaih ațangin harsatna eng emaw neuh neuh, sum leh pai thuah te, motor hman tur chung-changah te kan nei a; mahse, Pathian hian amah ringtu,

Dononjoy khuaa awmte tan biak in sak hi a lo tum em em mai a lo ni a. Chutiang Pathian programme pawimawh ti-hlawhtling theia kan awm hi kan lawm em em bawk a ni. Kan kal lam ațanga kan haw lam thlengin Pathian hruaina a taka mit ngeia hmuh tur kan tawng nasa em em a, Pathian zawk hi kan duh dan danin kan hruai zawk ta em maw tih mai tur khawpin Pathian hruaina kan dawng a, kan lawm hle a ni.

– R. Lalhruiailuanga
Asst. Secretary
KTP, Lungdai Branch



Hei hi ngaihtuah hmasa teh....

- * *I chaw ei tur a tui loh thu i sawi hmain hei hi ngaihtuah hmasa teh – chaw ei tur nei lo tam tak an awm tih hi.*
- * *Nun i nin thu i sawi hmain hei hi ngaihtuah hmasa teh – an tum aia hmaa thi tam tak an awm tih hi.*
- * *I fate i vin hmain hei hi ngaihtuah hmasa teh – fa neih ch k em em, nei thei si lo tam tak an awm tih hi.*
- * *I in leh lo vawn fel thuah i phunnawi hmain hei hi ngaihtuah hmasa teh – in leh lo nei lo, kawthlera khawsa tam tak an awm tih hi.*
- * *Thui tak tak lirthei i khalh vanga i nin thu i sawi hmain hei hi ngaihtuah hmasa teh – lirthei nei lova thui tak tak kea kal an awm tih hi.*
- * *I hna i nin thu i sawi hmain hei hi ngaihtuah hmasa teh – hna nei lo leh taksa harsatna vanga thawk thei lo tam tak an awm tih hi.*
- * *Rilru hah vanga i indawm kun hmain hei hi ngaihtuah hmasa teh – i la dam alawm; chuxangin, hlim takin nui la, lawm thu sawi ang che.*



HRINGLANG TLÁNG

Rawngbawlna danglam

Khawvel ram tin hian man chawia hman tur taxi hi kan nei vek mai a; mahse, a khalhtute rilru put zia hi a lo danglam thei khawp mai. Ram thenkhat taxi khalhtute chu mi bum tur zawng reng rengin an hmanhlel a, thenkhat lahin a man pangngai aia sang lak phêt an tum baw a, mi phurhte (passengers) hnena Pathian thu hril chu a hla khawp mai. Amerawhchu, S. Korea rama taxi khalhtute erawh an danglam tlat. Chuan man ringawt an thupui ber lo, an mi phurhte hnenah Pathian thu an hrilh thin tlat asin.

Hyun-sook Han-i chu South Korea ram khawpui pakhat, Busan-a cheng a ni. Ni khat chu mamawh zawrhna dawr lian (Departmental store)-ah an bazar a, a ina haw nan taxi a la a, taxi hman khalhtu hming chu Moon-ja Kang-a a ni. Han-i chuan a nuna thil thleng tur chu a hre phak lo.


A chuanna taxi driver chu Kristian a ni a, tun hmain la inhre ngai lo mah se, Kang-a chuan Kristian a nih angin a mi phurh hnena Chanchin Tha hril chu a tih tur niin a hria a, a sawipui ngei reng a, biak ina inkhawm turin a sawm zui baw a.

Han-i'n a sawmna a pawm avang chuan a lawm takzet a. "Lalpa, biak inah rawn hruai thleng ang che,' tiin ka rilruin ka fawngtai nghal a," tiin Kang-a chu a fawngtai a. A tawpah phei chuan Han-i chu Lal leh Chhandamtu atana Isua Krista pawmtu niin, Kristian a ni zui ta nghe nghe.

Busan khawpuia Kristian, taxi khalhtu 450-te chu Missionary Taxi Club tih hming puin an intel khawm a, chutah chuan Kang-a chu member a ni. He Club-a tel member tin chuan an passenger-te hnenah Kristian radio programe an ngaihlaktir thin bakah anmahni testimony an hrilh a; an theih ang angin Chanchin Tha an hril thin bakah inkhawm turin an sawm thin baw a.

He Club member-te hian Busan kawthler chu an rawngbawlna hmun (mission field)-ah an ngai a, an passenger apiang chu Pathianin an rawngbawlna tura a pekah ngaiin an theih ang angin Chanchin Tha an hrilh thin a ni. A Club thiltum ber chu chatuan hmuna an passenger-te thlarau hruai thlen a nih avangin, an thiam ang angin Chanchin Tha an hrilh thin a ni.

– Heather Sells



KANTU

Serchhip Chhim Veng Br.

Serchhip Chhim Veng Branch KṚP hi kum 1954 September ni 12, tlai dar 3-ah Bawngchawm khuaah kohhranin OB 5 ruatin a din a. Zoram buai avangin kum 1967 January thla khan Bawngchawm khua chu Serchhipah sawi khawm a ni a, kum 1976-ah Bawngchawm Veng tih ṭhin chu Serchhip Chhim Veng tih a lo ni ta a ni. Kum 2004 khan KṚP Golden Jubilee ropui takin an lawm a, Diamond Jubilee pawh 2014 September thlaah ropui takin an lawm bawk a ni.

Kum 2017 hian KṚP member 212 (Mipa 133 leh hmeichhia 79) an awm mek a. Branch Committee-ah hian OB 6, Committee member ruat 18, Kohhran Aiawh Upa 2 leh Bialtu Pastor 1 an awm a, thla tin Thawhlelni hmasa ber zanah Branch Committee a ṭhu ṭhin. Branch tichak turin

Group 2 (Mosia Group leh Isaia Group) din a ni a, Group Budget Rs. 12,000 ve ve an nei mek a ni. Sub-committee pali – Programme, Reception & Ushering, Evangelical leh Project Sub-Committee-te din a ni bawk. Kum 1997 aṭang khan Pathianni tin chanchinbu CHALLENGER (Cho chhuaktu) tih chu tichhuakin, sermon leh kohhran programme-te tihchhuah ṭhin a ni a, kohhran mipuiten an hlut hle. CKṚP chanchinbu Kristian Ṭhalai copy 45 an la mek bawk. Kuminah hian project 3 – musical instrument lei, biak in carpet thar lei leh KṚP Room siam an nei a, eng emaw zat an tihlawhtling tawh a ni. Missionary 6 an chawm mek a, an member 2 missionary-in an chhuak mek bawk.

Thawhṭan zan hi Sermon Inkhawmah hmangin Pathianni tlaiah ṭawngṭai

Inkhawm an hmang ðin. Member hlate leh missionary-te pualin an ðawngðai rual a, thuchah tawi an ngaithla ðin baw. Thla tin Thawhðanni hnuhnung ber zan inkhawm banah member hlate pualin an ðawngðai ðin. CKTP aþanga tih tur awm (Thupui zir, etc.) chu an tihlawhtling thei ve zel a. Presbytery leh Bialah pawh theihtawp chhuahin rawng an bawl a, Kohhran Zaipawlung tak an nei ðin baw.

Kum 1974 aþang khan KTP In (Semi-RCC) an nei a. A chung leh hnuai mi luahthin chenna in nei lote tan a ðangkai hle a, branch sum

hmuhna ðangkai tak a ni baw. Inhlawhna hrang hrang – slab chhun, ban khur laih, lehkhabu zawrh, pickle siam, balu/brick unload leh KTP thawh awm chi hmangin an inhlawh ðin a. KTP Ip an siam a, committee member-ten bial inchan semin thla tin Pathianni hnuhnung berah an la khawm ðin. Kumin hian sports ðum 2, indoor leh outdoor nei tawhin Evangelical Nite an hmang tawh baw. Synod Mission Field-ah tum hnih work camp an nei tawh a, zawngchhang tlak an ti hle.



Hlawhtling tur chuan...

Ni tin mihring kan hmachhawm zaa 90 hi a thim zawnga thil thlir ðin mi an ni. Chhang an ken pawhin, chhang tlang aiin a khem lai kher an hmu ðin a, tui an in pawhin no tlang bal lai kher an hmu ðin.

Heng mite hnen aþang hian fakna emaw, nangmah tichak tura fuihna thu emaw dawn inbeisei suh. I nihna aþang khan hnûk chhuak thei lo che mah se i tun dinhmun aia hniam daiha pawh thlak duhtu che an ni.

Chuvangin, heng mite hi hlau la, an lakah inveng fimkhur la, an zingah awm suh la, i duhthusam mitthla kha rûk botîr hek suh.

Keimahni



■ **WEST PHAILENG** : September 2-4, 2017 khan KṮP General Conference vawi 57-na thlengtu tur West Phaileng Organizing Committee inbuatsaihna thlithlaiin Upa Zonunmawia (Gen. Secy.), T.Upa Ngurhmingliana (Asst. Leader), Upa Rosangliana leh T.Upa Ricky Lalrammawia Raltete an kal a. September 2 (Inrinni) tlaiah Organizing Committee leh Sub-Committee hrang hrang member-te nen inkawmin an inbuatsaihna report ngaihthlak a ni a, zawhna leh chhanna hun te hman a ni bawk. Organizing Committee nena inkawmnaah hian General Conference thlengtu puihna ₹10,00,000/- (cheque) chu GS Upa Zonunmawian Organizing Committee Treasurer kutah a hlan. Tlaiah zanriah kil ho nghal a ni a. Inrinni zan aṅangin, Sunday School hun tel lovin Pathianni zan thlengin Bial chhunga kohhran 6-ah inkalthelhin hetiang hian hun pek an ni: Upa Zonunmawia – Dinthar, Chhim Veng & W. Phaileng; T.Upa Ngurhmingliana – Kanan, Bethlehem & Chhim Veng; Upa Rosangliana – Bethlehem, Electric & Dinthar; T.Upa Ricky Lalrammawia Ralte – Electric, W. Phaileng & Kanan Kohhran. An kalna apiangah Pastor, Pro. Pastor leh Upaten an ṭawiawm ṭha hle. Pathianni tlaiah Conference pandal sakna tur field an an en ho va. An inbuatsaihna a ṭha hlein hriat a ni a, hmabak erawh an la ngah fu. Sum thawh chhuah (Fund raise) lamah ngaihtuahawm an ni lovin a lang. Kohhran pawl dangte nen an thawh hona a ṭha a, an phur tlang viau bawk.

■ **DELHI** : September 8-12, 2017 chhung khan KṮP, Delhi Branch Musical Meet hmanpuiin Rev. Zothansanga (Leader), T.Upa Ngurhmingliana (Asst. Leader), Pu K. Lalruatpuia leh Pu Lalchhuanliana te an kal a; Nl. Lalfamkimi (Com. member),

chhungkaw thila Delhi-a zinin a tawiawm bawk. September 9 (Inrinni) chawhnuah Fellowship hun hmangin Pu K. Lalruatpuian thuchah tawi a sawi a, zawhna leh chhanna hun hman a ni bawk. Zan lam Pathian biak inkhawmah Leader Rev. Zothansangan thuchah a sawi a, Pathianni chawhma leh zan inkhawmah a sawi bawk. Pathianni chawhnuah fellowship hun hmang lehin Asst. Leader leh Pu Lalchhuanliana ten thuchah tawi (Min. 5) an sawi a. September 11 (Thawhtan) zan KṚP inkhawmah Asst. Leader T.Upa Ngurhmingliana thuchah a sawi. A bul aṅanga a tawp thlengin Pathian Thlarau hruaina leh awmpuina an dawng nasa hle.

■ **MISSION VENG BIAL** : September 14, 2017 khan Mission Veng Bial KṚP Diamond Jubilee lawmna, Mission Veng Kohhran Hall-ah Rev. Zothansanga (Leader), Upa Zonunmawia (Gen. Secy.), T.Upa Ngurhmingliana (Asst. Leader), Pu P.C. Biakmuanpuia (Asst. Secy.), Pu Zonunsanga Ralte (Treasurer) leh Pu K. Lalruatpuia te an kal. Jubilee ruai theh zawhah Moderator Rev. Lalzuithangan *Jubilee Plaque* a hawng a. Zan dar 7:00-a jubilee lawmna inkhawmah Treasurer Pu Zonunsanga Raltein hunserh a hmang a, Leader Rev. Zothansangan Mission Veng Bial Zaipawl music video a tlangzarh bawk.

■ **SYNFO PRAISE ON 2017** : September 15, 2017 khan Synfo Praise On 2017 hlanna, Khatla Kohhran Hall-ah CKṚP Committee min sawm angin T.Upa Ngurhmingliana (Asst. Leader), Upa Rosangliana, Pu Lalchhuanliana, T.Upa Zomuana Ralte, Pu Lalhnehzova, Pu F. Lalremruata leh Nl. Lalfamkimi te an kal.

■ **HOSPITAL CHARITY HLAN** : September 21, 2017 khan Hospital Charity Fund, Bial 166 aṅanga lo lut ₹5,46,753/- chu Synod Hospital-ah hlan a ni. A hlannaah hian T.Upa Ngurhmingliana (Asst. Leader), Pu P.C. Biakmuanpuia (Asst. Secy.), Pu Zonunsanga Ralte (Treasurer) leh Pu Vanlalpeka (Finance Secy.)-te an kal a. Charity Fund hi Coordinator i/c

Synod Hospital Office-ah hlan a ni a. T.Upa Ngurhminglian kaihruaiin fund luh dan tlangpui a sawi a, Pu Zonunsanga Raltein Hospital Coordinator Upa F. Lalsangliana hnenah a hlan a, Pu P.C. Biakmuanpuia a tawngtai a, Upa F. Lalsangliana lawm thu a sawi.

■ **MKHC SEMINAR** : Mizoram Kohhran Hruaitute Committee (MKHC) buatsaih Seminar on Issues Facing Christians Today, September 26, 2017 chawhma dar 11:00-a Synod Conference Centre-a neihah CKTP Committee member 10 intir turin min ngen angin, CKTP aiawhin Pu Zonunsanga Ralte (Treasurer), T.Upa Zomuana Ralte, Pu Lalmuanawma, Pu Lalhnehzova, Tv. Robert Lalduhzuala, Dr. David C. Vanlalfakawma leh Nl. Lalfamkimi-te an kal.

SYNOD CHOIR RAWNGBAWLNA

1. **DELHI BRANCH** : *September 9-11, 2017 khan Delhi Branch Musical Meet hmanpuiin an kal a, wawi 8 dinah hla 14 an rem. Zaipawl zai bakah heng item-te hi neih a ni: Solo – Tv. Lalremsanga, Tv. Jerome Lalhuapzova, Nl. K. Lalrampani, Nl. Lalremsiami, Nl. Grace Lalkhawngaihi; Instrumental – Tv. R. Lalchhuanawma. Member an kal kim a ni.*

2. **MISSION VENG BIAL** : *September 14, 2017 khan Mission Veng Bial KTP Diamond Jubilee lawmna, Mission Veng Kohhran Hall-ah wawi 1 dinah hla 2 an rem.*

3. **SYNFO PRAISE ON 2017** : *September 15, 2017 khan Synfo Praise On 2017 hlanna, Khatla Kohhran Hall-ah hla 1 an rem.*

4. **KANAN KOHHRAN** : *September 17, 2017-ah Kanan Kohhran Zaipawl Night-ah wawi 2 dinah hla 4 an rem. Pu Lallianmawia Tlau (Conductor)-in inhmelhriattirna neiin report a pe a, Director Pu K. Lalruatpuian thuchah a sawi. Hei hi rawngbawla chhuah tum 71-na a ni.*

NGENNA : Kristian Thalai chanchinbua chhuah atan thuziak rawn thawh zel turin kan sawm che u a. Thuchhuah tur nei chuan kristianthalai1970@gmail.com-ah thawn ni se, daka thawn duh tan – Editor, Kristian Thalai, Synod Office, Mission Veng, Aizawl tiin thawn ni se.



Kantu – Serchhip Chhim Veng Branch

CENTRAL K.T.P. HRUAITUTE, 2016-2018

Office Bearers

Leader	:	Rev. Zothansanga	9436365426
Asst. Leader	:	T. Upa Ngurhmingliana	9436374104
Gen. Secretary	:	Upa Zonunmawia	9436152024
Asst. Secretary	:	Pu P.C. Biakmuanpuia	9436374833
Treasurer	:	Pu Zonunsanga Ralte	9402113038
Fin. Secretary	:	Pu Vanlalpeka	9436153728

Committee Members

Tv. Joseph Lalsangzuala	9436152063	Pu Lalchuanliana	9862364583
Pu K. Lalruatpuia	8132813745	T.Upa Lalrinawma	9436152297
Pu Lalhnehzova	8119947974	Pu F. Lalremruata	9862561961
T.Upa H. Ramnunsanga	9436152320	T.Upa Zomuana Ralte	8794722319
Nl. Lalfamkimi	9436365245	T.Upa P.C. Lalropuia	9863144485
Upa Rosangliana	9612166769	Pu Lalmuanawma	9436196515
Dr. Lalrotluanga	9436153937	T. Upa Ricky Lalammawia Ralte	9862387308
Dr. David C. Vanlalakawma	9436156561	Tv. Robert Lalduhzuala	9862368012
Upa Lalmuanpuia	9436142398		

Ex-Officio Members

Rev. Lalzuthanga	-	Synod Moderator
Rev. Lianhmingthanga Sailo	-	Synod Secretary (Sr.)
Rev. B. Sangthanga	-	Executive Secretary, i/c KTP

Postal Regn. no. MZR/81/2015-2017
RNI No. MIZMIZ/2009/29074



Printed and Published by Zonunmawia, Synod Office, Mission Veng on behalf of Kristian Thalai Fellowship
Edited by Lalchhuanliana and printed at Synod Press, Mission Veng, Aizawl, Mizoram. Copies – 39,300